



სსიპ გარემოს ეროვნული სააგენტო

31 დეკემბერი 2025



N 829/ს

ბ რ ძ ა ნ ე ბ ა

დმანისის მუნიციპალიტეტში შპს „არ ემ ჯი გოლდის“ მიერ გარემოსთვის მიყენებული მნიშვნელოვანი ზიანის (სახელმწიფო ტყის ტერიტორიაზე არსებული მიწის დეგრადაცია) გამოსასწორებელი ღონისძიებების გეგმის შეთანხმების შესახებ

შპს „არ ემ ჯი გოლდი“ (ს/კ 225359947) ახორციელებს „გარემოსდაცვითი პასუხისმგებლობის შესახებ“ საქართველოს კანონის (შემდგომ - კანონი) მე-2 დანართის (გარემოსთვის განსაკუთრებით საშიში საქმიანობები) პირველი პუნქტით გათვალისწინებულ საქმიანობას (საქართველოს გარემოს დაცვისა და სოფლის მეურნეობის მინისტრის 2021 წლის 30 აგვისტოს №2-1297 ბრძანებით გაცემულია გარემოსდაცვითი გადაწყვეტილება).

საქართველოს გარემოს დაცვისა და სოფლის მეურნეობის სამინისტროს სახელმწიფო საქვეუწყებო დაწესებულების – გარემოსდაცვითი ზედამხედველობის დეპარტამენტის (შემდგომ – სსდ – გარემოსდაცვითი ზედამხედველობის დეპარტამენტი) უფროსის 2023 წლის 29 მარტის №DES92300000086 ბრძანებით (შემდგომ – №DES92300000086 ბრძანება), გარემოსთვის მნიშვნელოვანი ზიანის მიყენების გამო, შპს „არ ემ ჯი გოლდს“ კანონის მე-6 მუხლის მე-7 პუნქტის და 28-ე მუხლის მე-3 პუნქტების საფუძველზე დაეკისრა მკაცრი გარემოსდაცვითი პასუხისმგებლობა.

№DES92300000086 ბრძანების მიხედვით, შპს „არ ემ ჯი გოლდის“ უკანონო ქმედებით სანაყაროებზე ფუჭი ქანების ნაკადების გაზრდამ გამოიწვია სანაყაროს მიმდებარედ, სახელმწიფო ტყის ტერიტორიაზე არსებული მიწის დეგრადაცია, კერძოდ: კარიერის მე-5 უბნის ფუჭი ქანების სანაყარომდე მისასვლელი გზის კონტურში სახელმწიფო ტყის ტერიტორიაზე არსებული 18 013 კვ.მ ფართობი მიწის დეგრადაცია, კარიერის მე-5 უბნის ფუჭი ქანების სანაყაროს პირველი ბლოკის არეალში სახელმწიფო ტყის ტერიტორიაზე არსებული 152 363.5 კვ.მ ფართობი მიწის დეგრადაცია, კარიერის მე-5 უბნის ფუჭი ქანების სანაყაროს მე-2 ბლოკის არეალში 59 215 კვ.მ ფართობის სახელმწიფო ტყის ტერიტორიაზე არსებული მიწის დეგრადაცია.

ჯამში დადგინდა 229 591.5 კვ.მ სახელმწიფო ტყის ტერიტორიაზე არსებული მიწის დეგრადაცია, რაც „გარემოსდაცვითი პასუხისმგებლობის შესახებ“ საქართველოს კანონის მიხედვით, წარმოადგენს გარემოსთვის მიყენებულ მნიშვნელოვან ზიანს და შესაბამისად, იწვევს გარემოსდაცვით პასუხისმგებლობას.

შპს „არ ემ ჯი გოლდის“ მიერ, კანონის მე-8 მუხლის მე-5 და მე-7 პუნქტების მოთხოვნის შესაბამისად, 2023 წლის 31 მაისს, სსიპ გარემოს ეროვნულ სააგენტოში (შემდგომ - სააგენტო) წარმოდგენილ იქნა ინფორმაცია, №DES92300000086 ბრძანებით დადგენილი დაზიანებული გარემოს ნაწილის (სახელმწიფო ტყის ტერიტორიაზე არსებული 170 376.5 კვ.მ მიწა) პირვანდელ (ზიანის მიყენებამდე არსებულ) მდგომარეობასთან მიახლოებულ მდგომარეობამდე აღდგენის შესაძლებლობის შესახებ.

ზემოაღნიშნულ საკითხთან დაკავშირებით, სააგენტოში მიმდინარე ადმინისტრაციული საქმისწარმოების პროცესში, შპს „არ ემ ჯი გოლდის“ მიერ წარმოდგენილი ინფორმაციის განხილვის შედეგად დადგინდა, რომ №DES92300000086 ბრძანებით განსაზღვრული დაზიანებული გარემოს ნაწილის (სახელმწიფო ტყის ტერიტორიაზე არსებული 170 376.5 კვ.მ მიწა) პირვანდელ მდგომარეობასთან მიახლოებულ მდგომარეობამდე აღდგენა შესაძლებელია. შესაბამისად, სააგენტოს უფროსის 2023 წლის 19 სექტემბრის №474/ს ბრძანებით (შემდგომ - №474/ს ბრძანება) გამოიცა

გადაწვეტილება „შპს „არ ემ ჯი გოლდის“ მიერ დმანისის მუნიციპალიტეტში დაზიანებული გარემოს ნაწილის პირვანდელ მდგომარეობასთან მიახლოებულ მდგომარეობამდე აღდგენის შესაძლებლობის შესახებ“.

№474/ს ბრძანების მე-3 პუნქტისა და კანონის მე-8 მუხლის მე-5 პუნქტის „ბ“ ქვეპუნქტის შესაბამისად, შპს „არ ემ ჯი გოლდმა“ 2023 წლის 11 დეკემბერს №77.964 წერილით (სააგენტოში რეგისტრაციის №12237, თარიღი 11.12.2023) სააგენტოში შესათანხმებლად წარმოადგინა დმანისის მუნიციპალიტეტში, გარემოსთვის მიყენებული მნიშვნელოვანი ზიანის (სახელმწიფო ტყის ტერიტორიაზე არსებული 170 376.5 კვ.მ (აღნიშნული ფართობი შპს „არ ემ ჯი გოლდის“ მოთხოვნის საფუძველზე, სააგენტოს უფროსის 2025 წლის 4 ნოემბრის №686/ს ბრძანებით დაკორექტირდა და შეადგინა 166 745 კვ.მ) მიწის დეგრადაცია) გამოსასწორებელი ღონისძიებების გეგმა (შემდგომ - გეგმა). აღნიშნული გეგმა მომზადებულია შპს „არ ემ ჯი გოლდის“ მიერ.

წარმოდგენილი გეგმის მიხედვით, ტერიტორიაზე განხორციელდება სხვადასხვა სახის გამოსასწორებელი ღონისძიებები, რომელთა მიზანია რელიეფის ადგილობრივ ლანდშაფტთან მაქსიმალურად მიახლოება - ფუჭი ქანების ტექნიკური ფორმირება, გაშიშვლებულ ზედაპირებზე ნიადაგის ნაყოფიერი ფენის შექმნა, ტერიტორიაზე მყარი და პროდუქტიული მცენარეული საფარის აღდგენა. გეგმის თანახმად, უზრუნველყოფილი იქნება დეგრადირებული/დაკარგული ბუნებრივი რესურსების და დაზიანებული/შემცირებული/გაუარესებული ეკოლოგიური სერვისების პირვანდელ მდგომარეობასთან მიახლოებულ მდგომარეობამდე აღდგენა, კერძოდ:

მიწის რესურსის აღდგენა - ექვივალენტ ფართობზე ხელოვნურად შეიქმნება ნიადაგის ფენა საბაზისო მდგომარეობასთან მიახლოებითი პარამეტრებით (გამოყენებული იქნება მიმდებარე ტერიტორიებზე ადგილობრივი ტიპის და სტრუქტურის სხვადასხვა დროს მოხსნილი და დასაწყობებული ნაყოფიერი ფენის მარაგები);

ტყის მერქნული და არამერქნული რესურსის (ხე-მცენარეები და ბალახი) აღდგენა - ნიადაგის ფენაზე აღდგება ზიანის მიყენებამდე არსებული მცენარეთა თანასაზოგადოების მიახლოებითი შემადგენლობა და სტრუქტურა (ბალახოვანი საფარის ადგილობრივი სახეობის ხე-მცენარეების დარგვით);

ფაუნის წარმომადგენლებისთვის ტერიტორიაზე წვდომის აღდგენა - ტერიტორიაზე შეიქმნება მცირე მუშუქოვრების, მწერების და ფრინველების საბინადრო გარემო და საკვები ელემენტები (მრავალწლიანი ბალახოვანი სახეობები, რომლებიც გამოირჩევიან პროდუქტიული თესლბრუნვით და ხანგრძლივი რევეგეტაციის უნარით).

ზემოაღნიშნული გეგმის განხილვის მიზნით, კანონის მე-11 მუხლის მე-6 პუნქტის საფუძველზე, სააგენტოს უფროსის 2024 წლის 14 თებერვალის №99/ს ბრძანებით, შეიქმნა გეგმის განმხილველი კომისია, რომელშიც ჩართულები იყვნენ, როგორც საზოგადოებრივი ექსპერტები, ასევე სააგენტოს, სამინისტროს და სამინისტროს სისტემაში შემავალი დაწესებულებების წარმომადგენლები.

გეგმის განხილვის ადმინისტრაციული წარმოების ეტაპზე, გარემოსთვის მნიშვნელოვანი ზიანის მიყენებისას ზიანის გამოსასწორებელი ღონისძიებების განსაზღვრაში დაინტერესებული პირ(ებ)ის მონაწილეობის უზრუნველსაყოფად, სააგენტომ, კანონის მე-10 მუხლის შესაბამისად, ასევე უზრუნველყო ინფორმაციის განთავსება სააგენტოს ოფიციალურ ვებ-გვერდზე და გარემოსდაცვით საინფორმაციო პორტალზე. ადმინისტრაციული წარმოების ეტაპზე, აღნიშნულ გეგმასთან დაკავშირებით, დაინტერესებული პირ(ებ)ის მიერ შენიშვნები/მოსაზრებები სააგენტოში არ წარმოდგენილა.

გარემოსთვის მიყენებული მნიშვნელოვანი ზიანის გამოსასწორებელი ღონისძიებების გეგმის განხილვის ადმინისტრაციული წარმოების ეტაპზე, სააგენტოს მოთხოვნის საფუძველზე შპს „არ ემ ჯი გოლდ“-ის მიერ, 2025 წლის 19 დეკემბრის №111.763 წერილით (სააგენტოში რეგისტრაციის №13127, თარიღი 22.12.2025) წარმოდგენილ იქნა განახლებული გეგმა და მასთან დაკავშირებული დაზუსტებული ინფორმაცია, რომელსაც კანონის მე-9 მუხლის მე-3 პუნქტის შესაბამისად, თან ერთვის აუდიტორის/აუდიტორული ფირმის მიერ, დადასტურებული გეგმის ხარჯთაღრიცხვა.

ყოველივე ზემოაღნიშნულიდან გამომდინარე, „გარემოსდაცვითი პასუხისმგებლობის შესახებ“ საქართველოს კანონის მე-11 მუხლის საფუძველზე.

გ ბ რ ძ ა ნ ე ბ:

1. შეთანხმებულად ჩაითვალოს შპს „არ ემ ჯი გოლდის“ (ს/კ 225359947) მიერ 2025 წლის 19 დეკემბრის №111.763 წერილით წარმოდგენილი, დმანისის მუნიციპალიტეტში გარემოსთვის მიყენებული მნიშვნელოვანი ზიანის (სახელმწიფო ტყის ტერიტორიაზე არსებული 166 745 კვ.მ მიწა) გამოსასწორებელი ღონისძიებების თანდართული გეგმა.
2. შპს „არ ემ ჯი გოლდმა“ უზრუნველყოს დმანისის მუნიციპალიტეტში, №DES92300000086 ბრძანებით გათვალისწინებული დაზიანებული გარემოს ნაწილის - სახელმწიფო ტყის ტერიტორიაზე არსებული 166 745 კვ.მ მიწის პირვანდელ (ზიანის მიყენებამდე არსებულ) მდგომარეობასთან მიახლოებულ მდგომარეობამდე (ზიანის მიყენებამდე არსებულ) აღდგენა, შეთანხმებული გამოსასწორებელი ღონისძიებების გეგმით განსაზღვრული ღონისძიებების განხორციელებით, ამავე გეგმის გეგმა-გრაფიკით განსაზღვრულ ვადებში.
3. შპს „არ ემ ჯი გოლდმა“, „გარემოსდაცვითი პასუხისმგებლობის შესახებ“ საქართველოს კანონის მე-5 მუხლის, პირველი პუნქტის „ვ“ ნაწილით, ამავე ბრძანებით გათვალისწინებული მნიშვნელოვანი ზიანის გამოსასწორებელი ღონისძიებების გეგმის შეთანხმებიდან 30 კალენდარული დღის ვადაში საქართველოს სახელმწიფო ბიუჯეტში, სახელმწიფო ხაზინის ერთიან ანგარიშზე მიმართოს მნიშვნელოვანი ზიანის გამოსასწორებელი ღონისძიებების გეგმის ხარჯთაღრიცხვით განსაზღვრული ღონისძიებების საერთო ღირებულების თანხის 2%.
4. „გარემოსდაცვითი პასუხისმგებლობის შესახებ“ საქართველოს კანონის მე-11 მუხლის, მე-5 პუნქტის შესაბამისად, პასუხისმგებელი პირი ვალდებულია უზრუნველყოს მნიშვნელოვანი ზიანის გამოსასწორებელი ღონისძიებების გეგმის განხილვისთვის, სააგენტოს მიერ გაწეული ხარჯების (მათ შორის, ექსპერტიზის, კვლევითი სამუშაოების ღირებულების, საზოგადოებრივი ექსპერტის შრომის ანაზღაურებისა და სამივლინებო ხარჯების) სრულად ანაზღაურება, რამაც დმანისის მუნიციპალიტეტში, შპს „არ ემ ჯი გოლდის“ მიერ გარემოსთვის მიყენებული მნიშვნელოვანი ზიანის გამოსასწორებელი ღონისძიებების გეგმის განხილვისას შეადგინა - 2 120 ლარი. შპს „არ ემ ჯი გოლდის“ მიერ ამ პუნქტით გათვალისწინებული თანხის ანაზღაურება მოხდეს მნიშვნელოვანი ზიანის გამოსასწორებელი ღონისძიებების გეგმის შეთანხმებიდან 30 კალენდარული დღის ვადაში, საქართველოს სახელმწიფო ბიუჯეტში, სახელმწიფო ხაზინის ერთიან ანგარიშზე.
5. შპს „არ ემ ჯი გოლდმა“ უზრუნველყოს „გარემოსდაცვითი პასუხისმგებლობის შესახებ“ საქართველოს კანონით დადგენილი მოთხოვნებისა და პროცედურების დაცვა.
6. ბრძანება დაუყოვნებლივ გაეგზავნოს შპს „არ ემ ჯი გოლდს“ (ს/კ 225359947).
7. ბრძანება ძალაში შევიდეს შპს „არ ემ ჯი გოლდის“ მიერ მისი გაცნობისთანავე.
8. ბრძანება შეიძლება გასაჩივრდეს თბილისის საქალაქო სასამართლოს ადმინისტრაციულ საქმეთა კოლეგიაში (თბილისი, დ. აღმაშენებლის ხეივანი, მე-12 კმ. №6), მხარის მიერ მისი ოფიციალური წესით გაცნობის დღიდან ერთი თვის ვადაში.

ელენე ლუბიანური



სააგენტოს უფროსი

სსიპ გარემოს ეროვნული სააგენტო



